



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tiryimyim@aolima



tir yimyim

TAPAK 8

**Vladimir Putin o Kim Jong Un na defence agreement zülutep**

**Mbappe temang mejungi lir**



VOL. XXI ISSUE NO. 248 (ADOK 248) DIMAPUR YANGTEPNÜ (THURSDAY) AAMI (JUNE) 20, 2024 ₹ 5.00

## NDPP aser BJP tsüingda jembiba ama masü atalokogo: Jacob Zhimomi

**Kohima, June 19, 2024 (TYO):** BJP aser NDPP tsüingda Nagaland Urban Local Bodies election nung yariteptsü jembitep saka inyaka arudang iba amaji masü kümogo ta BJP MLA aser PDA Minister Jacob Zhimomi-i ashi.

NDPP lennir kari ULB elections nung BJP den tesentaktep maliba indang jembiba onük osangbenertemi metetnüa asüingdangdang "Onok tesentaktep lir aser tesüiba nung yariteptsü jembitep saka ward kar nungbo onok o onok na tokteper" ta Jacob-i langzü.

"NDPP MLA kati pa nija tebilemba ta ashiba angashiogo aser ibaji pai jangashitsüogo" ta paisa ashi.

BJP-i ward kar nung dang toktepbata atema asüingdangdang

"BJP MLA tem aliba jila kar dang lir, jila 3-4 dang lir aser item nung ozü candidate tem tokteper. Külén Eastern Nagaland nung aliba constituency tem nungbo election magir" ta Minister Jacob-isa langzü.

ENPO-i election nung shilem magitsü ta metetaka BJP-i parnok candidate tem dang nominations asütsü aser meyipa agitsü rongshi asü koda ta osangbenerisa asüingdangdang "ENPO dak sendakba nung olemtep ka alitsü aser parnoki tangatetba tajung nung tembangsü imlar" ta paisa ashi.

"BJP candidate kar den tetokteper mali takok nguogo aser iba atema pelar. Ano parnok aikati takok angutsü aser town councils balala nung councilors inyaksü teimla lir" ta Jacob-isa ashi.

## ULB election atema Jun 26 nü sodi agütsür

**Dimapur, June 19, 2024 (TYO):** Nagaland nung urban local body elections atema polling anogo June 26 nü sorkar mapa inyakterem asoshi sodi anogo asütsü metetdaksüogo.

Municipal aser town council tesemtem nung aliba sorkar mapa inyakteremi voting nung shilem agitsü atema June 26 'paid holiday' asütsü ta sorkari Bodbarnü metetdaksü.

Iba nung pei talidak toktsür tangalen mapa inyakterem dena

lir. Ano, Negotiable Instruments Act, 1881 (Act, XXVI) kübok municipal aser town council tesemtem nung inyakba bank aser senotsü rejutem nung inyakterem nem-a sodi agütsür ta sorkarisa ashi.

Ano, tanga sangdong ka nung Nagaland state sorkarisa June 22 (4th Saturday) nü municipal/ town council tesemtem nung election mapa inyakba offices/ departments atema working day asütsü osang metetdaksüogo.

## Delhi Heatwave nung nisung 20 süogo

**New Delhi, June 19, 2024 (Agencies):** India anüdoklentip tsütsü nisung aika heatstroke asüba atema Union Health Ministry-i sorkar mozü kitem dang heatstroke asürtem tongti süa anepalutsü tetuyuba agütsüogo.

Anü tatsük apoba tensa aser Centre-i ketdangsüba mozü kitem nung maparen atema senden ka amendang Health Minister JP Nadda-i 'special heatwave units' tentettsü atema tetuyuba agütsüogo.

Taküm meiwa aruba sülen New Delhi nung aliba tongtipang mozü ki asem nung nisung 20 süogo. Külén, Delhi Disaster Management Authority-ia heatstrokes aser iba dak sendakba nungi jembua alitsü atema osang kar metetdaksüogo.

Ram Manohar Lohia Hospital nung May 27 nungi tatsük dak sendakba timtemer nisung 45 tashi aniokogo. Iba mozü kidang heatstroke ajanga nisung 9 süogo aser parnok 7 tashi yashi o yakünü asüba liasü.

Safdarjung Hospital nunga heatstroke ajanga nisung 9 süogo aser iba nung Bodbarnü nisung 5 asüba züngsema lir. Ano Lok Nayak Hospital nunga tesüiba anogo 7 tsüingda nisung 2 asüogo.

Delhi Health Minister Saurabh Bharadwaj-ia Bodbarnü Delhi nung mozü ki tongtipang ajak nungi tekolakpurtem den senden ka menogo.

Idanggi Saurabh Bharadwaj-i mozü ki ajak nung tatsük agi timtemertem yaritsü atema yipdentem renema ayutsü tetuyuba agütsü.

## Lengrijan yimten aser lanurtemi metetdaksür

**Dimapur, June 19, 2024 (TYO):** Lengrijan Village Council aser Lengrijan Youth Organisation-i ULB Election atema tetuyuba kar agütsüogo.

Lengrijan telongtet nung kija/ telok shingaia youth camps melapoktsü aser ULB election

mapang LVC den LYO-i yi mesüra drugs ayokba/agütsüba mita reprangtsü ta parnoki ashi.

ULB election mapang candidate/political party temi Lengrijan telongteti tangar anir arutsü memelar ta LVC aser LYO-isa metetdaksüogo.

## Nagaland cooperative movement ajanga rongsenketzüng ajungkettsüla

**Kohima, June 19, 2024 (TYO):** Nagaland nung cooperative societies-i Cooperation Department nung register asütsüla aser rongsenketzüng jenjang tajungba akümba nung shilem agitsüla ta Cooperation and PHED Minister Jacob Zhimomi-i ashi.

Registrar of Cooperative Societies indang directorate building tasen lapoktsüdang Minister Jacob Zhimomi-i iba tayongzükba agütsü.

Nagaland nung cooperative societies 8000 tema aliba department-i bushitetogo aser parnok inyaksangshi jangjatsü atema mapa tenzükogo ta pai ashi.

Department-i diversification programmes ajanga tajanzük bentsür arutsü lenmang lir aser banks temia cooperative societies yariba osangtem metetepeladar. Department nung district in-charges den cooperative banks

amshitsü atema jembitepdar ta Jacob-i ashi.

Paisa cooperative societies dang Nagaland State Cooperative Bank den inyaksangshitsü mepishia metetdaksü.

Nagaland aser North East nung tourism industry dang takok ngua arudar anunggi Nagaland nung cooperative societies-ia iba wadang nung inyaksüla. Nagaland cooperative movement ya ola mali saka parnok teinyaksü lenmang aika dang sadema lir ta Minister Jacob-isa metetdaksü.

Naga nungertemi cooperative movement ajanga rongsenketzüng jenjang ajungkettsü imlar aser department-ia sensakertem yariba nung shilem agitsü. Asen yimsüng rongsenketzüng jenjang kümra asen state tejakleni aotsü aser renloksü, ta paisa ashi.

"State sorkari Naga nunger ya pei sasa liteta aoertem

kümdaktsünür. Chief Minister Neiphiu Rio lenisüba kübok sorkari Centre dak dang meimlai Naga nunger tejakleni aotsü atema lenmangtem bushiteper" ta pai ashi.

Naga nunger ket nung rongsen tulutibaji sen masü saka ali lir. Asenok ket nung ali peria dang lir anunggi asenoki meranga inyaka ali yagi rongsen kümdaktsütsüla. Nagaland State Assembly-i SARFAESI Act agizükogo aser iba ajanga asen ali nem legal status agütsür. Tang nungi Naga nungeri ali atema land patta (lal book) angutsü aser shishilembatsü atema loan agidang amshitettsü, ta Minister Jacob-isa metetdaksü.

Tanü Minister Jacob Zhimomi-i ki lapoktsü aser Executive Engineer PWD Housing Div-I Kohima, Abija Khing-i iba ki Rs 19.21 crore endoka yangluba osang lemsatep.

## Manipur lisopurtem kümzüksü atema CM menden metoktsütsü: Biren Singh

**Guwahati, June 19, 2024 (Agencies):** Yaküm Manipur nung tensa mejungi akümdang Chief Minister Nongthombam Biren Singh-i menden toktsütsü ashi saka tatsüka dang lir pai iba o ji meyipa agia liasü.

Tanü-a Biren Singh-i Manipur nung lisopurtem kümzükba ayutsü atema maneni Chief Minister inyaksü shiogo.

"Mangatettep anentsü ta süra ni pelashishia CM menden toktsütsü saka ni maneni inyaksü atema kuli kar lir" ta Biren Singh-i ashi.

Union Home Minister Amit Shah-i Delhi nung Manipur atema senden ka ayonga amendang CM Biren mejaokba sülen pa menden nungi anentsü akok ta jembir. Iba senden nung Union Home Secretary Ajay Bhalla, Intelligence Bureau Director Tapan Deka, Army Chief General Manoj Pande aser Army Chief-designate Lt Gen Upendra Dwivedi nunger aden.

Rashtriya Swayamsevak Sangh (RSS) tanishir Mohan Bhagwat-ia taoba Hombarnü Manipur nung security tayongzükbatem atema tebilemstü abenba lemsatepa liasü.

"Manipur tensa ya kanga dang majung aser tebenja lir. Manipur nung lisopurtem tarutsü atema lendong bentsür marur ka lenisüba nungdaker" ta CM Biren-i ashi.

"Ni akokba tashi tebilemstü koktetsü tebilemba lir kechiyong public aser kü sülen anidakertemi kü lenisüba nung tamang akaba sayuogo. Ni CM menden yutsüba agi mangatettep anentsü ta süra ni pelashishia yutsütsü. Ajisüka ni iba menden nung maneni amentsü atema kuli kar lir" ta pai ashi.

"Ozü sorkari drug mafia tem anema 'War on Drugs' tenzükba ajanga iba mangatettep adok. Drug mafia temi Golden Triangle ya Northeast India tashi kümdaktsünür. Sorkari ozüng alema arurtem aser tenemlen

poppy lu ayimba anema inyakba ajanga iba ya atalok" ta Manipur CM-isa ashi.

"Asenok tang atema masü saka tarutsü atema bilema inyaksüla. Manipur nung lisopurtem taruba küm 1,000 atema kümzükba ayutsü atema inyaksüla" ta paisa ashi.

RSS tanishir Mohan Bhagwat-i Manipur atema bilemstüba asoshi pelar. Manipur nung tashi balalai inyaker aser telemtetba ka bener arutsü atema timtemer kechiyong pei ajangzüksü asoshi bilemertemi BJP sorkar anentsütsü meranger, ta Biren Singh-isa metetdaksü.

"Bendanger tashi kar ajanga telemtetba magidaktsünür. Prime Minister Modi lenisüba kübok Centre sorkari Manipur asoshi tongti süa inyaker aser Union Home Minister Amit Shah lenisüba kübok high-level security meetings tenzükogo. Tekaratiba nung ken o tem angatetteptsü imlar" ta paisa ashi.

## ULB election: Candidate 669 nungi 79-i tenüng meyipa agi

**Dimapur, June 19, 2024 (Agencies):** Nagaland nung Urban Local Body (ULB) nung tokteptsü tenüng agütsür candidate 79-i parnok tenüng meyipa agiogo ta State Election Commission (SEC) ketdangsür kati ashi.

ULB election atema nominations agientsü tatemang anogoji June 18, 2024 liasü.

Nagaland nung municipal 3 aser Eastern Nagaland tesemtem dena town council 36 asoshi tetsür 238 dena candidate 669-i nomination papers agüja liasü.

Yashi tashi nung tenüng

meypa agirtemji Shamator Town Council nungi candidate 17, Longleng TC nungi 13, Tizit TC nungi 9, Chiephobozou TC, Pungro TC o Naginimora TC nungi tii (8), Aboi TC nungi 4, Dimapur Municipal Council nungi 3 aser Kohima MC Mokokchung MC, Wokha, Zunheboto, Chozuba, Aghunato, Atoizu, Peren o Niuland Town Council nungi kaka (1) lir.

Nagaland nung tesüsubaba ULB elections agibaji 2004 nung liasü aser küm 20 sülen June 26 nü agitsü sentong lir.

Nagaland nung tang mezüng

atema ULBs nung tetsür nem shilem 33% lemezükja election agitsü.

Eastern Nagaland Peoples' Organization (ENPO)-i ULB elections nung shilem magitsü ayongzükaka Eastern Nagaland kübok town councils 14 nung candidate 61-i nomination asü.

Iba sülen nomination papers scrutiny mapang candidate 2 indang kulikakettem magizük aser June 18 tashi nung tanüngba candidate 59-i tenüng meyipa agiogo. Iba ajanga Eastern Nagaland nung ULB elections atema candidate ka dang mali.

# Advisor Imkong Imchen-i Multi Media Mobile Vehicles sayatsü

**Dimapur, Aami/June 19 (TYO):** Advisor, IPR and Soil & Water Conservation, Imkong L Imchen-i June 19, 2024 nü Nagaland Civil Secretariat Plaza, Kohima nungi Multi Media Mobile Vehicles ti sayaja liasü.

Iba sentong ya Directorate of Information & Public Relations ajanga ayongzük aser District Public Relations Officers (DPROs) ti nem multimedia facilities aliba gari tasen ti ya amokja liasü.

Advisor, Imkong L Imchen-i iba sentong nung jembidang, IPR department indang field officers ya department balala atema nodal officers lir aser nenok ajanga sorkar indang policy aser sentong balala niburtem nem metetdaksütsü, ta ashi.

Asen niburtem jenjang ajungketsü aser renloktsü atema kisung ketdangsürtem

külemi inyaksüla, ta pai ashi. Paise ketdangsürtem dang pei nem nungloksüba maparen saksalema inyaksü aser gari tasentem aser danga facilities agüja aliba nibur tenzükba nung anepalua amshitsü aser state tesem tezülen aliba niburtem nema sorkar inyakyim osang sangoktsütsü ashi.

Multi Media Mobile Vehicles atema sen agütsüba atema Advisor Imkong-i state sorkar dang pelaba lemsatapa liasü.

Director, IPR, Dzuvinuo Theunuo-i iba project indang tongmelang agi lemsatapa mapang, niburtem nem osang sangoktsütsü nungdak tali akumba nung tongti shilem agitsü asoshi districts aser directorate nung item multimedia mobile vehicles nungdak ta department-i ajiteta liasü, ta ashi.

Item gari ajanga awareness

aser educational video, documentary ase danga PSAs tem sayatsü, ta Theunuo-i ashi.

Gari nungya projectors aser screens, laptops aser all-in-one sound systems lir, anungji tesem ajaklen mapang shidak nung osang tsüsang prokshitettsü, ta lai ashi.

Phase mezüngbuba nung Tuensang, Mon, Kiphire, Longleng, Zunheboto, Mokochung, Phek aser Wokha district tem awajemer aser Directorate densema tanüngba district tem atema taküm sa alitsü, ta ashi.

Iba sentong nung Development Commissioner and Principal Secretary, Justice & Law R. Ramakrishnan, IAS; Secretary, Information & Public Relations, Bhagyashree B. Banayat, IAS aser IPR indang Secretariat aser Directorate nungi ketdangsür aser staff tem dena liasü.

# Kiyonger tenzüktsü mulungteter nokdaker : L. Moatemjen

**Dimapur, June 19, 2024 (TYO) :** Lokongmendang ward Tuli nungi ULB candidate, Shri. L. Moatemjen yarirtem lokti senden sentong ka June 17, 2024 nü par kidang ayongzüka liogo.

Iba sentong nung 21 Tuli A/ C BJP Mandal nungi Aotemsui tayongzükba tulu agütsü aser youth tenüng nungi Wb. Senticuba-i jembi.

Iba den kiyong nung tanishir balalai ULB election sülen Lokongmendang Ward dangi terenlok bener arutsütsü teimla tulu nung Wb. L. Moatemjen yaritsü ajungshia



L. Moatemjen

teyariteper ajak dang kanga pelar, ta BJP candidate, L. Moatemjeni metetdaksü.

Paise ashiba agi, kiyonger tenzüktsü nukjidong yur, temulung nung tajung bilemer nokdaker asünungji mopung balala onaka item mopung nemji mamshidaksütsü.

Oda, ruling party den teka amteper inyaka aotsü asünungji kiyonger tantsütila/ tambutiba nungi tenzükter tanutsüla/tanubosang tashi temulung ka ser külemi odi, ta L. Moatemjenisa ayongzük.

Wb. Temjenjungbai iba sentong ketdangsüa agi.

# Arenmongla-i niburtem dang külemi tenzüktsü ayongzük

**Dimapur, Aami/June 19 (TYO):** Mokochung Municipal Council kübok Ward No. 7, Kumlong nungi Independent candidate Arenmongla-i niburtem dang külemi tenzüktsü asoshi maongka agüjang ta ayongzüka liasü.

Kumlong Community ground nung Mongulbarnü mass declaration sentong agidang Arenmongla-i la indang yimtim "Your vote for a better Kumlong' indang rateta ashi aser vote tejangja alirtem dang pei vote agütsütsü ajungshia liasü.

Municipal council nung züngsem ka ama shimtetra, ni niburtem den külemi



Mokochung Municipal Council kübok Ward No. 7, Kumlong nungi Independent candidate Arenmongla-i nübuyim sentong nung o jembidang tangokba noksa nung angur.

torchlight" indang rateta jembiba mapang, kuli tejangja ka mechi ni battery torchlight ya shim aser ibaji tesangwa yaloktsüba lir, ta ashi.

Ajisüaka torch light nung power source nungdaker, anungji niburtem 'battery' asütsüla, koba torchlight atema power source alitsü, ta Arenmongla-i ashi.

Kumlong Ward Council chairman, Lanu Imchen-i iba sentong nung jembidang election tesunep nung agütsü niburtem dang ayongzüka liasü.

Waromung Senso Telongjem Mokochung aser Mongchen Senso Telongjem Mokochung nungia iba sentong nung jembia liasü.

nokdaksü, nibur asoshi inyaksü aser teti niburtem den alitsü, ta lai nangzüka liasü. La indang symbol "Battery



ULB elections dak sendakba ken o jembitsü asoshi ADC & Returning Officer, Mokochung Municipal Council ajanga Deputy Commissioner, Mokochung indang Conference Hall nung June 19, 2024 nü senden ka ayongzüka liasü, kong candidate ajak, party workers, All Ward Union nungi züngsemtem, GBs, Mokochung Town Lanur Telongjem, Sector Magistrates aser Sector Police Officers tem dena liasü.

# STATE ULB ELECTION NUNG TETOKTEPER MALIBA CANDIDATE 64 YAMAI LIR :

List of Uncontested Candidates for Dimapur Municipal Council 2024			
Sl. No.	Ward No.	Name of Candidate	Party
1	5	Kuhoi Zhimo	BJP
2	15	Hukheto Yephthomi	NDPP

List of Uncontested Candidates for East Dimapur Town Council 2024			
Sl. No.	Ward No.	Name of Candidates	Party
1	1	Smti. Lireni Ovung	NDPP
2	2	Shri. Niuto Awomi	NDPP
3	4	Smti. Manna Zhimo	NDPP
4	5	Shri. K. Hokuto Murumi	NDPP

List of Uncontested Candidates for Niuland Town Council 2024			
Sl. No.	Ward No.	Name of Uncontest Candidates	Party
1	1	Visheli Zhimo	BJP
2	2	V. Samuel Holo	BJP
3	9	Kakheka Zhimomi	BJP

List of Uncontested Candidates for Medziphema Town Council 2024			
Sl. No.	Ward.No	Name of Candidates	Party
1	7	Smti. Seyievino Vitsu	NDPP

List of Uncontested candidates for Kohima Municipal Council 2024			
Sl. No.	Ward No.	Name of Candidate	Party
1	1	Kelhousenuo Khruomo	NDPP
2	2	Avelie Rio	NDPP
3	8	Thejavizo Philip Solo	NDPP
4	11	Neibodzelie Solo	NDPP
5	15	Ketuosie Khamo	NDPP

List of Uncontested candidates for Chiephobozou Town Council 2024			
Sl. No.	Ward No.	Name of Candidate	Party
1	1	Smt. Ruvuotuoouo Ruth	NDPP
2	2	Shri. Khriellele Kerhuo	NDPP
3	3	Shri. Lhoubeituo Kezieo	NDPP
4	4	Smti. Ruulhouuo Kiewhuo	NDPP
5	5	Shri. Kiyasetuo Kengurusie	NDPP
6	6	Shri. Khriebeituo Rulho	NDPP
7	7	Smt. Kekhrieneinuuo Zumvu	NDPP
8	8	Shri. Keviselie Rupreo	NDPP
9	9	Smt. Khriellevinuo Angami	NDPP

List of Uncontested Candidates for Peren Town Council 2024			
Sl. No.	Ward No.	Name of Candidates	Party
1	4	Smt. Ilungrai	NDPP
2	9	Shri. Gaigwang	NDPP

List of Uncontested Candidates for Jalukie Town Council 2024			
Sl. No.	Ward.No.	Name of Candidates	Party
1	8	Tingba Hegui	NDPP

List of Uncontested candidates for Tening Town Council 2024			
Sl. No.	Ward No.	Name of Candidates	Party
1	2	Kerang Dumtta	NDPP
2	7	Rambin	NCP
3	8	Mairisibo Rengmunta	NCP

List of Uncontested Candidates for Wokha Town Council 2024			
Sl. No.	Ward.No	Name of Candidates	Party
1	1	Y Renthunglo Kikon	NDPP
2	4	Lily T Humtsoe	NCP
3	13	Nzano P Kikon	BJP
4	14	Rhukumo Kikon	BJP

List of Uncontested candidates for Bhandari Town Council 2024			
Sl. No.	Ward No.	Name of Candidates	Party
1	2	Khontungia Odyuo	NPF
2	7	Renbilo M Humtsoe	NPF

List of Uncontested Candidates for Zunheboto Town Council 2024			
Sl. No.	Ward.No.	Name of Candidates	Party
1	4	Niukali K Assumi	NDPP

List of Uncontested Candidates for Satakha Town Council 2024			
Sl. No.	Ward No.	Name of Candidates	Party
1	5	Vikaho Sema	NDPP
2	6	S. Khehoto Sema	NDPP

List of Uncontested Candidates for Atoizu Town Council 2024			
Sl. No.	Ward No.	Name of Candidates	Party
1	2	S Khehoto Chophy	NCP
2	8	Ivuka Z	NDPP
3	9	L Hekhevi Sema	NCP

List of Uncontested Candidates for Aghunato Town Council 2024			
Sl. No.	Ward No.	Name of Candidates	Party
1	4	Kum. Juvitoli Katty	NDPP
2	8	Shri. Hoka	NDPP
3	9	Shri. Nitokhu T Yeptho	NDPP

List of Uncontested Candidates for Mokochung Municipal Council 2024			
Sl. No.	Ward.No	Name of Candidates	Party
1	1	Moangtula	NDPP
2	5	Imtiyapang	NDPP
3	6	Imkongchuba A	NDPP
4	13	Walunila	NDPP
5	18	Wabang Kichu	NDPP

List of Uncontested Candidates for Tuli Town Council 2024			
Sl. No.	Ward.No	Name of Candidates	Party
1	4	Shilutila	BJP
2	5	Imlionen	INC
3	6	Temsunenba Imsong	INC
4	7	Chubarenla	NDPP
5	8	K. Imlitemjen Jamir	INC
6	9	Alemchuba	NDPP

List of Uncontested Candidates for Changtongya Town Council 2024			
Sl. No.	Ward.No.	Name of Candidates	Party
1	2	A Chubanokdang	NDPP
2	5	Imkummeren	NDPP

List of Uncontested Candidates for Mangkolemba Town Council 2024			
Sl. No.	Ward No.	Name of Candidate	Party
1	6	A Meren Walling	IND

List of Uncontested Candidates for Pfutsero Town Council 2024			
Sl. No.	Ward No.	Name of Candidate	Party
1	4	Smti. Khazu Dukru	NDPP

List of Uncontested Candidates for Meluri Town Council 2024			
Sl. No.	Ward No.	Name of Candidate	Party
1	1	Thsiivila	INDP
2	2	Sutsutho Poehury	NDPP
3	3	Z. Porhutho Ngouri	NDPP
4	4	Ziirhotshii Kajiri	NDPP

# Modi-i Nalanda University nung campus tasen ka semzük



June 19, 2024 nü Nalanda district nung Ato kilonser Narendra Modi-i Nalanda University indang campus tasen ka semzüksüdang tangokba noksa nung angur.

**Patna, June 19 (Agencies):** Bodhbarnü Bihar kübok Rajgir nung Ato kilonser Narendra Modi-i Nalanda University nung campus tasen ka semzüksüogo.

Iba sentong nung External Affairs Minister S Jaishankar, Bihar Angh Rajendra Vishwanath Arlekar, Chief Minister Nitish Kumar, Deputy Chief Minister ana Samrat Choudhary aser Vijay Kumar Sinha na aser linük 17 nungi ambassadors densema liasü.

Nalanda University nung campus tasenba ya India aser East Asia Summit (EAS) linüktem senteper yangluba liasü.

Iba sentong jakdang Modi-i X ajanga, "Iba anogo ya asen shisaliok sector atema anogo

tajung ka lir. Tanep 10:30 ako nung Rajgir nung Nalanda University indang campus tasen ka semzüksü. Nalanda ya asen puti otsü nung tongti tesem ka lir. Iba university ajanga maneni lanurtem shisaliok nungdak peritsütsü," ta metedakja liasü.

Ato kilonser Modi-isa Nalanda Mahavira semdanga liasü.

Nalanda University indang campus tasenba ya akhidang Nalanda nung shisaliok reju teraksa anasa lir. Iba university ya Nalanda University Act, 2010 ajanga amenoka liasü.

2007 küm Philippines nung East Asia Summit aliba mapang nung Nalanda nung univesity ka amenoktsü telemtetba agiba sülen 2010 küm iba Act agizüka liasü.

Iba University ya 2014 küm mezüing lapokdang khenpiga atema yangluba kiojen nung kaketshir 14 liasü aser 2017 küm nungi University asü tenzüka liasü.

Iba campus nung academic block ana, classrooms 40 aser menden 1900 shi lir.

Iba campus nung auditoria ana lir aser ana nungji menden 600 lir. Kasa campus nung student hostel ka lir aser iba hostel nung kaketshir 550 shi asemstü. Iba dak alia campus nungsa International Centre ka, amphitheatre ka, faculty club aser sports complex lir.

Iba University amenokba nung shilem agir India den linük 17 ji- Australia, Bangladesh, Bhutan, Brunei Darussalam, Cambodia, China, Indonesia, Laos, Mauritius, Myanmar, New Zealand, Portugal, Singapore, South Korea, Sri Lanka, Thailand aser Vietnam lir. Iba university amenokba nung yaritsü atema item linüktemi MoU nung sign süa liasü.

Akhidang Aso 5buba mapang nung Nalanda University ya amenoka liasü aser alima tesem balala nungi kaketshirtem arua iba reju nung zünga liasü. Akhidang aliba university ya küm 800 tashi liasü saka Aso 12buba mapang nung yimakeritemi raksaja liasü.

# Bus amakba ken o nung kiralongrartem yarir ka puogo

**Srinagar, June 19 (Agencies):** June 9, 2024 nü Jammu & Kashmir kübok Reasi district nung kiralongrartemi temeshi aini aoertem mena aliba bus ka amakba ken o dak sendakba nung J&K police-i nisung ka puogo. Iba nisungba jagi kiralongrartemi yarisema liasü

Iba tatalokba nungji nisung 9 asü aser nisung 33 yirua liasü. Union Home Minister Amit Shah leniba nung ketdangsertem senden ka mena J&K nung security tesen asadanga sülen June 17 nü iba ken o bushisüngdangtsü atema National Investigation Agency (NIA) nem agüja liasü.

Bodhbarnü Reasi senior superintendent of police, Mohita Sharma-i, "Kiralongrartemi Reasi amakba aken o dak sendakba nung nisung ka puogo.

Asalentong yanglusangji pa masü saka iba amakba nung pai-a tongti shilem ka agia lir," ta metedaktsü.

Police-i ashiba agi, tai tonglokja pua alisangji Rajouri nung alir Hakim Din lir. Bus amaker kiralongrartemi pai yarisema liasü.

Uttar Pradesh aser Delhi na nungi temeshi aini aoertemi bus ka nung toudak mapang kiralongrartem jagi bus dakji injang khaloktsüba sülen bus ji lungreni lua tsükoka liasü.

Iba tatalokba atema Pakistan-i pusemba Resistance Front (TRF)-i parnok sasa tenüing agi. TRF telok ya kiralongrar telok Lashkar-e-Taiba (LeT) nungi jakzükba lir.

TRF-i sangdong ka ajanga, tarutsü nunga maneni kiralongrartemi tanga state nungi arurtem amaktsü, ta amokmerenogo.



June 19, 2024 nü New Delhi nung AAP lenir aser Delhi Minister Atishi-i osangbenertem senden ka nung jembidang tangokba noksa nung angur.

# NEET ken o dak sendakba nung Congress-i longkak aittsü

**New Delhi, June 19 (Agencies):** NEET medical entrance exam nung ochimashi liasü, ta tai tonglokja kaketshirtemi longkak aitba mapang Congress party-ia June 21 nü linük tesem ajaklen state headquarters nung longkak aita kaketshirtem temeden atema takhangba agütsütsü.

State ajak nung Congress Tirtem, Congress legislature party lenirtem, state in-charges, general secretaries aser tongti ketdangpurtem dang shidi ka ajanga Congress general secretary K C Venugopal-i NEET-UG 2024 tatidang agiba aser results sangdongba nung tashishiba onük aika aliba ya bentettsü nungdak, ta metedaktsü.

Shidi ajanga Congress lenir Venugopal-i, "National Testing Agency (NTA)-i NEET-UG 2024 tatidang result June 4, 2024 nü sangdongba nenoki meteta dang lir. Iba tatidang nung ochimashi jenti liasü aser nisung kar marks kanga tali angu aser 'paper leaks' liasü ta tai tonglokja lir. Examination mapang technical tsütsü timtem liasü, tim masüba inyakyim benshi aser tatidang centre kar nungbo ochimashi liasü. Bihar, Gujarat aser Haryana nung nisung aika apuba ajanga ochimashi liasü ta kuli jangjar. Iba ya ajanga

BJP-i yimsüsüba state tem nung ochimashi inyakba jungkai adoktsür," ta metedaktsü.

Supreme Court-ia tai tonglokja alibatem ya süoki ia agitsüla ta shiogo, ta Venugopal-i ashi.

"Item ama ochimashi inyakyim ajanga tatidang inyakyim akhümket raksatsür aser tenendak kaketshirtem aika indang tarutsü jenjang raksatsür. Congress party-i asen manifesto nung lanurtem tarutsü jenjang atema 'paper leaks' anema ozüing tesashi benoktsü ta nangzüka lir," ta paisa party lenirtem nem

metedaktsü.

"NEET examination nung ochimashi jenti aliba aser NDA sorkari iba atema ola madokba anema Hokolbarnü, June 21, 2024 anogo nung All Pradesh Congress Committees dang state headquarters nung kaketshirtem atema temeden meshija longkak aittsü metedaktsür," ta Venugopal-i June 18 nü züluba shidi nungji shia lir.

"Longkak aitba sentong nungji party nung lenir taintem aser party nung tongti lenirtem ajaki shilem agitsüla," ta Venugopal-isa metedaktsü.



June 19, 2024 nü New Delhi nung Congress MP, Rahul Gandhi asoba anogomong nung pai cake rangsadang tangokba noksa nung angur. Kasa noksa nung Congress Tir Mallikarjun Kharge, Priyanka Gandhi Vadra aser K C Venugopal nungera angur.

# 2024 küm millionaire 4300-i India linük toktsür aotsüa akok

**New Delhi, Aami/June 19 (Agencies):** Taküm India nung millionaire 4,300-i India toktsür aotsüa akok, aser parnok teimbaka United Arab Emirates (UAE)-i oa alitsü, ta Henley & Partners report ajanga metedaktsü.

Yaküm-a India nung millionaire 5,100-i linük toktsür bendang linük balalai oa ali, ta parnokisa metedaktsü.

Tang alima nung rongsenkettzüng tekeratiba ainba linükji India lir aser alima nung millionaire temi pei linük toktsür tangaleni oa aliba linüktem rongnung India jenjang tasembuba akümstüa akok. Mezüingbuba aser tanabuba jenjang nung linük anaji China aser UK na asütsü.

Tang alima nung nütsüing teimtiba aliba linükji India lir aser India nung millionaire temi linük toktsür aobaji China den medemdanga India nung shilem 30 agi tajemba lir. Kasa report ajanga, "Küm

shia India nung millionaire meyirjang aikati linük toktsür UAE-i oa alir," ta metedaktsü.

Kasa report ajangasa, 2024 küm tatembanglen tashi nungbo alima tesem balala nungi millionaire 6,700 shi UAE-i oa alitsü, ta metedaktsü.

UAE sülen tanabuba jenjang nung United States lir. Taküm küm tembang tashi nung alima tesem balala nungi millionaire 3,800 shi US-i oa alitsü.

Taküm millionaire 128,000-i pei aliba tesem melenshütsüa akok, aser ibaji kuli balala ajanga lir. Taküm kümzüka alitsü, rongsen jenjang tajungba akümstü, saru tsütsü tajangzük angutsü, business maongka, libaliro jenjang tajungba akümstü aser chirnurtem nem shisaliok tajungba agütsütsü nükjidong nung millionaire temi pei aliba tesem melenshir, ta report nung shia lir.



## TIR YIMYIM YIMOBILEM (EDITORIAL)

DIMAPUR YANGTEPNÜ, JUNE (AAMI) 20, 2024

### Asenok ya Modiba'er ak asü ?

**N**i alidak yimti nung Fair Price Shop ajanga süi shia gari tajungtesa anena yur nisungtemji nungtepa 'relief jang' aliba angur. Ibaji angudang, Food & Civil Supply department ajanga jangotsü angatia agütsür aser ano langlaga jang seret nung sen asem pezü agia agütsür ta asüba teyari ya Naga nungertembo gari akar makar mesüra takar sensaker ajak nem agütsür asü ta rataasa bilemer. Kasaji, yashia Fair Price Shop ka ajanga süidang gari aika anendena yur nisungtem 'relief jang' aliba angu. Idangji, jet ta kü mulungjangi taoba mapang ka asen Nagaland kilo kilonser Patton-i Naga nungerbo ajak relief jang agi taküm alir aser iba relief jang dang Naga nungertemi 'Modi jang' ta ajar ta linük ato kilonser dang shiogo ta kanga nümadanga ashiba bilemteter. Atangji, Delhi nungi Public Distribution System ajanga yokba apibo Nagaland nung alir Naga nungerbo ajak amai fair price shop nungi angati mesüra jenjang dalang agi anguba jangotsü alia chiyonger amai bilemtsüsa adoktsü. Aji oda, asenok kecha meinyaki Pattonbai ashiba amaji Modibai yokba relief jang agi taküm alir süra, asenok ya Modiba'er ak amai asütsü, kechiyong asenoki metsüba kiset shirurusa asüyonga tanga kiset shirurubo ak amai kecha meinyakdaksü chi agüjabo memetsür. Aji oda, antema chirema senzüdaksür, azü nema kibo nükdaksür, nashi aser janga chiremer aser mapaa inyakdaksür, anungji item kiset shirurutem nem yabo kiburi 'relief' magütsüyonga taküm litettsü. Ajsüaka, akbo asenoki shibanger kecha lenia moudaktsüi chiyongtsü agüja metsür, item chiyongtsütem ajakji 'relief chiyongtsütem' lir. Item kiset shirurutem den kodang asenok tanü taküm aser kibong jenjang medemdangdir asenok relief jang chiyongertem ya ak dang mesük. Atangji, alima nung nisung shinga tangar teyari magii taküm melitet, takartema aser sensakertema pei nungdak yari tangar teyari nungdaker. Ibayongji, alima ya yaritepa aliba lima ta jembir. Ajsüaka, asenbo kecha meinyak ser asen taküm aser kibong ajak tangari 'relief' agütsüba nung dang metaloker lira, asenji relief agütsür tsüngdangjibo nisung masü ak amai asütsü. Aji oda, taonunga aser asüngnepa mapang shitak nung relief chi angutsü asünungji, ak ki nung alir aktemi kecha shisabolua mebilemer. Kasaji, meinyakaka mapang shitak nung relief chiyongtsü angutsü asünungji mapa inyaktsüa nungdak madoker, anungji asenok rongnung kati ka dang "na kechi inyaker ? Tanüa koloni aotsü ? ta asüngdangtsü nungdak madoker, kechiyong shinga kecha meinyaker aser shinga kechaia moi kidang amungtsübaji temetet dang lir. Atangji, akbo kecha meinyak metsüyonga tesüsabo kibur ajangzüker saka asenok yabo relief chi chiyonga-chiyonga tangar lar kümer alima nung alia memetet ali küma aotsüba purtem lir. Iba tia ya bilemdang dang, shitakba asenok ya kecha meinyak relief jang meshia chiyongli, vote yokli aser tagidak makaba politics jembia kazüli ta asütsü asoshi dang alima nung alir asü ta tezüdanga bilemer. Kena asenok rongnung terabo tangatetba dangi aruagi tanü asüngbo aikati chirnurtem atema tiyazü kuli iagi post matric scholarship amabo agia mezüngdaksür. Ashi, asenok ya tazüngba, chiyongba, mapa inyakba aser asenok akaba ajak ya tiyazü-tiyazü dang agia tangar dak dang metaloker aliba lokti ka lir ta ashitsüa langa lir. Aji oda, asenoksasa mapa meinyaki tangari relief agütsüba kisung nung temulung ser, tuluka ama bilema, asen taküm aser kibong lia aotsü bilemra asenok ya asenoki puoker metsüba ak jenjang den kasasa lir ta bilemdi. Aji oda, asenoki asenoksasa Modi jang chiyongbaji tuluka ama bilem tashi asenok nüchi nisung masü ak a ta dang bilemdi. Asenok nisungchi akümtsü atema tamasa asenoki asenoksasa 'Relief jang' magii asen taküm aser kibong mesütettsüla. Asenok Modiba'er relief jang chiyonga Modiba den koda Naga yimten nüchiso indang jembitsü aser Nagaland topur ajung indang koda ashitsü ?

## OLEMSABANG

### KOMA BILEMER

- T. Lima Tzüwar, Ungma Aonglenden, Artang Ward

Tamasa asen Ao kin tzükong trok sanger Ao sünak abener dang ya shiner. Taoba mapang NNC aser UDF Govt. mapang nungi tenzüker asen Ao kin nungi India-i oa MP ka tanga meshimi aruba tanü asen Ao kin-a tangar matsüngdang tejak terabo tentettsüsa asen Aor Telongjem ajanga MP ka adoktsüogo aser adoktsüba amaji pai asenok Naga nunger ajak asoshi o tongtar aser terenlok mapa ajak nung inyaktsütsü aser jembitsütsü ta yimla atar. Yamaji asen Ao kin 6/7 sanger ajaki tali longjemshir asen Mokochung District renloktsü merangdi arungma. Yamaji tang ULB election INC nungi nübu kwika aitsü lir, parnok nungittsü merangdi. NDPP nungia sang INC nungia sang IND nungia sang kwi adokdir atokakaba ka küma longjemer terenlok mapatem inyakyonga aotsü asünung ozü Govt sa tuluba aser tashi taitba asünung onok nübu timba asütsü ta bilema party kar mesüzüka nübu timba asütsü memerangtsüla aser memesüzüktsüla. Asen Ao kin dak tenük merem mokok-achi agi sünger niang temetetba niang tashiba ta metoktepi asen Ao kin ajungtsü merangtsü masü no, tanü asen Ao kin ya tebur dang nungibo tetsürtemang tamajungba akümer ama ajiteter.

Tang India lima nung BJP-i anir NDA aser tangar party ana anioker Govt. tenzüker, aji saka küm 5 bo junga Govt. bener maotsü amai reprangteter. India nung Ram tekülem ki yanglua alibaji India telongjemi magizüker aser aji Muslim nunger li aser RSS lenirtemi BJP -i menden aika nung tamakok angu asünung RSS partytema mepelar, kechiyong Ram tekülem kiji parnoki medoktsüner. Ano külen NDA telongjem den atenba party ana jagia cabinet minister meshiba den speaker akanger, temulungjang animesüngzük aonunga junga memejangi tebilemtsü tulu alitsü südi. Manger sangwa nung govt. chireptsü ana nung lir.

Temeim asen Ao sünak abener tzükong 6/7 sanger aser Naga nübur tajungtem, tanur lanur aikati memetet, saka taoba mapang NNC aser UDF Govt nungi tanü NDPP aser BJP tashi Govt melentepyonga arur aser tang NDPP aser BJP yagibo küm 15 nung Govt. benyonga arur küm 15 buba nung Govt bener oaka terenlok mapa junga inyakbabo mali, sentsübo timba timba akümer India govt.-ibo terenlok asoshi sen crore sa crore yoker, saka pei yangku asüngba timba aser terenlok inyaktsüba ishiba ta inyaktsüba ajanga küm ka ana tsüngda nung rakzükyonga aor südi. Temeim Naga nunger aser Nagatsür tajungtem aser asen Aor Aotsür tajungtem temenen tera tulutibaji asenok mulungjang masü no? aser asenok meimchir temulungjangji mojing tang mesük, tangar north east purtembo India Govt-i terenlok asoshi sen yokba lenmang tzü, light agi pei lima kanga tepur junga yanglutena ayur aser school ki aser temeket tepur junga ayur, saka asen Nagaland kechi tia nung lidar bilemdangangma. Ya asen Aor Aortsürtemi anir Naga nunger ajaki ola adoktsüla masü no?

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



June 18, 2024 nü Chümoukedima district kübok Vidima yimdak Koinonia Baptist Church (KBC) indang ministry Koinonia Prayer Centre (KPC) amenoktsü atema foundation lung azüngba sülen tangokba noksa nung angur.

## Word Alive-i ministry anenba sangdongogo

**June 19, 2024:** Khristantem indang nüngtugu festival 'Word Alive'-i parnoki küm 15 tashi ministry mapa inyaka aruba sülen iba ministry anenba sangdongogo.

Word Alive trustees nung Director Nigel Beynon-i, "Onoki sentong agitsü atema tesem balala- holiday parks, universities, conference centres aser cruise ships bushiba indang nenoki meteta dang lir. Onoki akokba tashi tasen apiteta inyaktsü merangogo," ta metetdaksü.

Paisa, "Tejashitsüka onoki senotsü agi alangzüktetsüsa lenmang mangu. Anungji tang atemabo 'Word Alive' atema Kibubai lenmang shibangtsüogo ta onoki amanger," ta metetdaksü.

2022 küm nunga Pontins (Word Alive benjung agitsü aliba holiday park)-i coronavirus wara ajanga holiday parks ajak shibanga atar, ta metetdakja liasü.

Word Alive ya mezüngbo 'New Word Alive' nüngja liasü. UK nung UCCF aser Keswick Ministries longjemer parnoki küm shia evangelical Khristan tesayuba nung item sentong agia liasü. Word Alive festival sentong kübok Bible

study agütsü, tekülem sentong agi aser kibong züngsemtem nem shilem balala agidakja liasü.

Iba sentong nung nisung 4,000 shi sa jaoka liasü aser iba sentong ya Europe nung evangelical kaketshirtem atema sentong tulutiba liasü.

Osangbener den jembidang UCCF-i, "Word Alive anenadoker, ta osang angashia onok kanga jashir," ta ashi.

UCCF-isa, "Word Alive ajanga mapa tulu inyaktetba asoshi Tsüngrem dang pelar aser UCCF-i Word Alive den longjemer inyakba asoshi pelar. Talisa onoki kaketshirtem nütsüngsüba nung yaritetba aser Arogo tenzüktetba atema pelar. Word Alive team-i iba ministry tembangba mapang nung onoki parnok atema sarasademtsür. Iba ministry ajanga küm aika tsüngda süngjang tajung tangdaksüogo," ta metetdaksü.

Tesüiba küm ana tashi Word Alive nung trustee züngsem aser 2010 küm nungi planning team nung züngsem, John Stevens-i, "1994 küm mezüng ni Word Alive sentong nung dena liasü; iba mapang nungjibo iba sentong ya Spring

Harvest shilem ka liasü. Iba mapang nungjagi tenzüka ni iba sentong nung teti aden. Lai otem sangdongba ajanga ni kanga tajangzük nguogo. Ozü chirnurtema Word Alive indang group balala nung intet. Onok Arogo tilaka dang liasü, anungji ozü chirnurtem Khristan aika den shilem agitetba ajanga parnok ajungmesoa liasü," ta ashi.

"Trustees-i tanga tesem ka bushitsü kanga merangogo, tesüsa iba sentong anentsüsa akümba atema ni mepelar. Word Alive-i lenmang balala ajanga agütsüba temoatsütem maneni agitsüji kanga tongtibang asütsü," ta paisa metetdaksü.

Word Alive anenba maparen ya taruba ita ishika agitsü, iba denji külemi parnoki senotsü agi yarirtem danga temelungertemibo ita shia tenla agütsüba anentsü akok saka tang-a sentsüh aotsü atema senotsü teyaribo maneni nüngdaksü, ta metetdaksüogo.

Beynon-isa, "Tsüngremi mapa tulu inyakba aser moatsüba atema onoki Pa nem tenüngsang agütsür. Talisa onoki tesüiba küm aika onok nungita yarirtem dang pelar," ta lemsatep.

## Manipur nung yimjung maparen tenzüka atema Khristantem pelar

**June 19, 2024:** Centre sorkari Manipur nung yimjung atema ken o jembu tenzüksü asoshi telemtetba agiba atema tribal Khristantem pelar.

Yaküm May 3 nü Manipur nung tribal Kuki Khristantem aser Meitei Hindu nungertem tsüngda rara tenzüka sülen tang tashi nung Khristantem teimba ser nisung 220 dak tema süogo aser Tenla ki aika raksatsü/rongdoktsüogo.

Arogo lenir kati, "Yaküm tenzüka rara ya tesem tasen aika nunga prokshidar, aser iba ya asenok ajak asoshi tebilemstü onük ka lir," ta metetdaksü.

June 17, 2024 nü Union Home Minister, Amit Shah-i Manipur nung tribal Khristantem aser Hindu Meitei nungertem tsüngda yimjung ken

o jembu tenzüksü, ta metetdaksüogo.

Arogo lenir kati, "Iba ya telemtetba tajung ka lir; onoki küm ka dak tali iba ama telemtetba agitsü yongyaa liasü," ta metetdaksü.

June 18 nü osangbener den jembidang Arogo lenir jagisa, "Sorkari süoki ia kanga nendaka inyakra parnoki yimjung bener arutetsü," ta ashi.

Nütsüng million 3.2 aliba Manipur state nung nütsüng shilem 53 jungnüabo Meitei Hindu nungertem lir aser nütsüng shilem 41 shi Khristantem lir, aser parnok teimbaka Kuki-Zo tribal Khristantem lir.

Yaküm May ita nung Manipur nung rara tenzüka sülen Ato kilonser, Narendra Modi-i iba state mesem dang.

Tawa Modi leniba nung Centre nung sorkar tasen akümba sülen anogo ishika tsüngda Union Home Minister-i Manipur nung yimjung ken o jembu tenzüksü sangdonger.

Arogo lenirisa, "Sorkari telemtetba tajung kecha magiba ajanga state nung nüburtem tetsübu nung dang lia arudar," ta ashi.

Tribal Khristantemi Jiribam nung Manipur aser Assam na sendaktepba lenmang mokdangba sülen June 17 nü New Delhi nung Amit Shah-i senden ka ayongzüka amen.

June 6 nü arrshi küm 59 tambur ka tekolak tangzüka lepsetba ajanga state Chief Minister N. Biren Singh-i Jiribam semdangtsü aliba thinen aser pa meinba gari telungpurtemi maaka liasü.

## ANO GO ABEN TSÜNGREM DEN

### Nüji

"Saka Tanela agi nenok anira nenok ozüng kübok mali" (Gal. 5:18)

Tanela agi jajabaji temelaba ka anguba masü ta Pauli ashi. Mazüokba nüji jagi maongka agütsüba mejungi kümdaktsür. Tanela nung jajaba tetezü, meinyaknüba ajak inyaktsüba asü? Kodanga masü. Ibai aseni inyaknüba ajak inyaktsü atema masü. Iba tetezü, na ne mapa ajak shitak inyaktsü nüji, kodang shi talenba kübok lidir ozüng aika kar. Saka kodang Tanela nem anitaktsüdir, Tanelai mulungba dang inyaknütsü, ibaji nüji lir.

Kodang ozung talenba kubok lir, mauyatsüla ta ashir, yi majemtsüla ta ashir, drugs machitsüla ta ashir, nüktapangta mebenshitsula ta ashir, tai memenatsula ta ashir. Shirnoki yangji aibelendir parnokjibo aputsü aser ozüng talenba kübok ayutsü. Süra ibaji nüji asü masü? Kodanga masü.

Kar tsüngdang nüji ama bilembaji shitakba nung nüji masü, saka talenba küboki aiba lir (Gal. 5:1). Tsüngrem ozüngji tenokdangba masü, saka tawabangba lir. Tajung inyaktsü nüji Tsüngremi asenok nem agütsü aser aji asen teinyaktsü. Kodang tanela nem anidaktsüdir, mapang ajak nung Pai mulungba nung dang jajanütsü, anungji asenok asoshi ozüngji nüngdak makaba mapa ka akümer. Kechiaser mezüyongi asenoki tai o temenen na aser yazü o ochi naji bendanga metet. Asenok ozüng talenba kübok masü nüji alitsü Pai temeden agütsüba asoshi Pa tenüng sangdi aser iba nüji-ji tamshi shia amshidi.

## MP nung anti conversion ozüng kübok pua aliba Khristan 11 chiok

**June 19, 2024:** Taoba hopta Madhya Pradesh state nung law firm kati yaritepba ajanga 2022 küm anti-conversion ozüng kübok pua aliba Khristan 11 chiokogo, ta International Christian Concern (ICC)-i metetdaksü.

Indore nung aliba law firm kati, pua aliba Khristantemji chioktsü atema parnoki ita ana tashi ken o jembija aruogo, ta metetdaksü.

Khristantem pusemba law firm jagi sangdong ka ajanga, "2022 küm social media nung video ka porkshiba sülen anti conversion ozüng kübok Arunachal Pradesh nungi pastor ka, Northern state nungi pastor ka aser Madhya Pradesh kübok Khargaon nung lisopur pastor ana pua liasü," ta metetdaksü.

Tang Madhya Pradesh nung BJP sorkar lir.

Khristan anemertem nisung kari pastor temji aputsü atema Lok Sabha nung MP ka rongshiba sülen tesüsa pastor temji pua.

Ano tanga tatalokba ka nung, sorkar ketdangsertemi tamalen

arem nung auer ka aser teseülen Khristan akümer ka den külemi Khristan trok pua liasü.

Lower court kati Khristan tenetji aija liasü saka law firm jagi Khristantem atema court nung ken o jembitsüba sülen parnok ajak chiokogo.

Ano tanga tatalokba ka nung, Hindu yimsü alia amangertemi Khristan yimsü agizüker ka anema apusoba sülen paji apu. Law firm jagi pa pusemba ken o jembitsüba mapang nung district superintendent of police-i kasa nisungbaji anema local goonda act kübok ken o ka benoka liasü.

United States Commission on International Religious Freedom (USCIRF)-i ashiba agi, India nung state 28 nungi state 12 nungbo anti-conversion ozüngtem benoka lir. Item states rongnung Madhya Pradesh, Arunachal Pradesh, Chhattisgarh, Gujarat, Haryana, Himachal Pradesh, Jharkhand, Karnataka, Odisha, Rajasthan, Uttarakhand aser Uttar Pradesh state tem densema lir.

AO OSHI ANGAZÜKDAK: TANÜ ANGAZÜKTSÜBA OJANG



Tabelen

(n) teka külen, tachiji masü ( left hand side)

\* Tebelen agi pen amer zülurbo aika mali.

Tabenba

(n) temang nung amlokba sü (shawl, cloth)

\* Kin shia pei pei sobaliba tabenba sü kaka lir.

OLONG PAITEP # 6823

Grid for OLONG PAITEP # 6823 with numbers 1-16 in various cells.

TIPLÉN

- 1. Ojembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzük asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

- 1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 6821 TELANGZÜBA

TIPLÉN :

- 1. Taa, 3. Teküm, 6. Aibelen, 7. Aut,
9. Ajizük, 10. Ojala, 11. Semer, 13. Sen,
15. Kioktsü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
5. Mitsüksü, 6. Azübenshi, 8. Lah,
9. Jangkok, 12. Akok, 14. Nashi, 16. Sür.

NAI-A YA METETTER MA




June 17, 2024 nü Men's T20I century tekaratiba yanglutetogo aser iba ya Estonia nung Sahil Chauhan-i yangluba lir.

Estonia aser Cyprus tsüngda T20I asayadang arishi küm 32 tain Chauhan-i 41 balls nung 144\* 144\* züktoka liasü. Estonia nung Chauhan-i boundaries 24 züktok aser iba nung 27 balls nung dang 100 runs nguteta liasü.

Iba asaya nung Chauhan-i 18 sixes züktoba ya single innings nung Men's T20I record ka lir.

NCP MLA temi Pema Khandu'er sorkar pusema nungiter



Itanagar, June 19, 2024

(Agencies): Arunachal Pradesh nung NCP MLA 3-i Pema Khandu'er sorkar pusema nungitba metetdaksüogo.

MLA asem - Nikh Kamini, Likha Soni aser Toko Tatung nungeri CM Khandu den ajurutep aser BJP-i aniba sorkar pusemba shidi ka agütsü.

CM Khandu-ia parnok dang

pelaba metetdaksü aser iba ama teloktep ajanga state tejakleni aotsü ta ashi.

"Nationalist Congress Party (Ajit Pawar) nungi MLA asem-Nikh Kami, Likha Soni aser Toko Tatung nungeri tatemzükba kecha melii Arunachal Pradesh nung BJP sorkar pusemba atema kanga pelar. MLA temi kü den ajurutepdang shidi ka agütsüogo"

ta Khandu-i metetdaksü. "Nenok tenangzükba aser amalitepa pelashishia agizüker. Asenok longjemer Arunachal Pradesh renloktsü aser azkarutsü atema inyaka odi" ta pai ashi.

Taküm assembly election nung Nikh Kamin-i Bordumsa-Diyun constituency, Toko Tatung-i Yachuli constituency aser Likha Soni-i Lekang constituency nungi takok ngua liasü.

Tesüiba anogo ana tsüngda independent candidate 3 aser People's Party of Arunachal (PPA) 2-i Arunachal nung BJP sorkar pusemba metetdaksüogo.

April 19, 2024 zünsngem 60 agi akümba assembly election nung BJP-i menden 46 nung takok angu.

National People's Party (NPP)-i menden 5, Nationalist Congress Party (NCP)-i 3, People's Party of Arunachal-i 2, Congress-i 1 aser independent 3 takok angu.

Manipur nung KCP-Noyol (KCP-N) telungpur 3 apu

Imphal, June 19, 2024

(Agencies): Manipur nung Kangleipak Communist Party Noyol Group (KCP-Noyol) züngsem asem puogo.

Parnok yagi tashiyim agi sen saruba mapa iyak aser Kakching district police o 37 Assam Rifles külemi apu.

Kakching district kübok Langmeidong Bridge nung par asem apu aser parnok ket nungi

mobile handset 3, demand letters 2 aser gari ka ngutetogo.

Par asem ya Laikhuram Sanatomba (Mani), Heikrujam Dinesh aser Tongbram Nganthoiba nung ta jangjaogo.

Par asem dang asüngdangya asüandang Thoubal aser Kakching district tem nung sorkar office tem, mapa inyakerkem aser shishilembartem dang nungi

tashiyim agi sen meshiba nangzükogo.

Parnok ket nungi apuba osettem den külemi parnok ajak Waikhong police station ket nung agütsüogo.

Assam Rifles-i Indo Myanmar arrtsü anasa Songtong nung KCP züngsem ka aser KYKL züngsem 2 apuba sülen KCP-Noyol züngsemtem apu.

South Salmara-Mankachar nung Section 144 benoker

Guwahati, June 19, 2024

(Agencies): Assam nung South Salmara-Mankachar district administration-i Brahmaputra River anasa nisung adenshiba noktanger.

Tzüngluruwa mongpu nung aser talisa tzümetsüng lendong nungi public kümzüka ayutsü atema Section 144 CrPC ozüng

benoker ta South Salmara Mankachar district, District Magistrate Rahul Kumar Gupta-i ashi.

Hatsingimari Tiniali nungi Sishumara BOP tashi aonung 10:00 ako nungi anepdang 6:00 ako tashi

Iba curfew ya tzümetsüng lendong balala nungi nübertem

kümzüka ayutsü atema lir. Ajisüika iba tenokdangba kübok police, army aser emergency personnel ama essential service providers madener ta ketdangsurtemi ashi.

Ano, marketing, sports, education mesüra bus stations nung nisungtem adenshitsuabobo melar ta parnokisa ashi.

Mizoram nung biometric enrollment atema Centre nungi osang atar

Aizawl, June 19, 2024

(Agencies): Mizoram nung Myanmar refugee 33,000 tema biometric enrollment inyaksü atema Centre dang nungi tetuyuba atar ta state sorkari ashi.

Osang agütsüba sülen state sorkari Myanmar refugee tem indang biometric data bendentsü. Iba atema biometric enrollment portal ka lapokogo ta state home department ketdangsur kati ashi.

"Onoki Centre dang nungi tetuyuba atar. Osang aruba sülen onoki Myanmar nung biometric data bendentsü" ta pai ashi.

Mizoram chief minister Lalduhoma-ia taoba nung biometric enrollment portal ka lapokogo aser iba nung data bendentsü ta shia liasü.

Prime minister Narendra Modi aser Union home minister Amit Shah nati ashiba ama biometric enrollment portal lapok ta Lalduhoma-isa ashi.

Mizoram aser Manipur sorkartem dang ozüng alema arurtem indang biometric aser biographic details bendentsü tetuyuba agüja liasü.

Ano, yaküm June ita state tem dang September tatemlen tashi nung campaign tembangtsü atema tetuyuba agütsü.

Mizoram sorkari Centre-i ashiba nung ajemdaker training agi aser nodal officers shim saka yaküm September ita Council of Ministers senden nung Myanmar nung indang biometric aser biographic enrollment meinyaksü lemtet.

Yaküm November ita state assembly election agitsü aliba ajanga biometric aser biographic maparen inyaksü meshitak ta senden nung lemtet.

Centre-i biometric data bendentsü tuyuba ajanga Mizoram nung jenoka aliba Myanmar aser Bangladesh nungeri parnok meyipa yoktsü tsübuteper Chief Minister

Lalduhoma-i ashi.

Taküm January ita CM Lalduhoma-i Amit Shah den ajurutepa senden amendang kidanger linük ana nung tensa mesüngjem tashi refugee tem meyoxtsü lemtet.

Myanmar nung tanur 12,901 dena parnok 33,835 tashi jenoka lir aser teimbaka Champhai district nung lir ta Mizoram home department-i ashir.

Myanmar nung 10,552 tashi district 6 nung lapoka aliba relief camps 111 nung jenoka lir aser parnok 9,269 tashi kinunger mesüra medemertem aser para kitem nung lir ta parnoki ashi.

Ano, Bangladeshi nung 1,800 tashi Lawngtlai district nung jenoka lir Mizoram home department-isa metetdaksü.

Maneni, Manipur nungi internally displaced people 8,000 shi ka Mizoram nung jenoka lir ta parnokisa ashi.

## Putin o Kim Jong na defence agreement zülutep

**Seoul, Aami/June 19 (Agencies):** Bodhbarnü Russia Tir Vladimir Putin-i North Korea lenir Kim Jong Un den mutual defence agreement ka zülutepogo, shibai Ukraine rara nung tashi ajak agi yaritsü mulunga aliba ashi.

Küm 24 nung Putin-i tang mezüngbuba Pyongyang semdanga yangji senden ka amendang tezüngzüktep ka yangluba nung mitkar tsütsü tesendaktep ya shilem ka liasü.

"Ibai tongtipang document ka lir, aser iba yagi danga aika rongnung linük ka anema dangari tashiyim amshiba mapang tangatettep nung yariteptsü dena lir," ta Russia tiri North Korea yimtiba nungi osangbener senden ka nung ashi.

World War II sülen North Korea linük balaka akumba sülen linük ana ya tembar süa arur aser 2022 küm Russia-i Ukraine amak tenzüka sülen tesendaktep tali tajungba akum.

Ukraine nung raratsü atema North Korea-i Russia nem injang-bomb aser missiles tem agütsür ta United States aser par tembar linüktemi aija arur, aser tang iba tezüngzüktep renemba ajanga ano injang-bomb tali agütsütsü südi ta ajiteter.

"Tanü treaty ka yangluba dak sendakba nung Russia-i DPRK den military-technical cooperation malitsü ta mashir," ta Putin-i North Korea indang official tenüng amshia ashi.

Kim-i Putin ya Korean nübür asoshi tembar tajungtiba ta ashi aser Ukraine rara nung par linüki Russian sorkar tashi ajak agi yaritsü ta ashi. Russia-i Ukraine amakba mechi temerenshi ama UN-i Moscow nem tenokdangba balala

agüja lir.

Putin-i meyiper Kim dang pelaba lemsatetep aser tensa tia ajak nung kasa yariba atema Moscow-i pelar ta shia liasü. North Korea-i nokdanga aliba nok-nü yanglua amshiba mechi mapang talangka nungi UN-i tenokdangba agüja lir.

Kanga sashia tenokdangba agüja aliba linük ana yagi anüolen linüktem tasa tamajung tatok magütsütsü aser UN-i North Korea nem tenokdangba agüja aliba reprangshitsüla, ta Putin-i ashi.

"US aser par tembar linük temi animesor UN Security Council nung mapang telatet makai DPRK nem tenokdangba agütsüba reprangshitsü nenshia ashir," ta Putin-i ashi.

Putin ya Bodhbarnep Pyongyang tonga arudang red carpet nung Kim-i agizüka salem sütepa liasü.

Iba sülen tena Kim II Sung square nung Putin agizükba sentong ka nung aden, kong military band ka aser nisung aikati tsüngsangba agi shilem agia liasü, aser iba sülen Putin-i Kim dang Moscow semdangtsü jaoka liasü.

Putin meina Defence Minister Andrei Belousov, Foreign Minister Sergey Lavrov aser Deputy Prime Minister Denis Mantrurov densema tongti ketdangsür aika oa lir.

Iba sülen tena kisüng menteper mapang talangka sensaksema liasü, koba küm ka tsüngta tena tanaben ajuruteper alitsü.

Taoba küm September ita Kim ya pa indang bulletproof train nung mener Russia far east leni oa space port ka nung Putin den ajurutepa senden mena liasü.

Korea linük ana ya 1950-

53 rara tsülen technical tsütsü rara nung lir aser iba linük ana sadangba arütsü ya alima nung sepai timtima aliba tesem ka lir.

Nuclear nok-nü aser missile sentongtem mechi North Korea nem United Nations Security Council ajanga küm aika temerenshi ama tenokdangba balala agüja lir.

North Korea-i nok-nü tendangba aser satellite anünglaki yokba mechi US-i anir UN ajanga tenokdangba tasen agütsütsü merangba China den külemi North Korea asoshi tongtipang tembar Russia-i nokdanga liasü.

March ita nunga Russian veto ka ajanga UN sanctions monitoring tembangdaksü, aser iba yongji Ukraine nung amshitsü atema Moscow-i Pyongyang nungi nok-nü aliba nung tetsükdaksü majurutsü meranger ta anüolen linük temi tai tonglokja liasü.

Putin-i North Korea semdangba ajanga Ukraine nung rara tenzüka aliba nung nüngdaka aliba angutsü asoshi Russia-i tesendaktep tashi itshitsü merangba sayur, ta Washington, DC nungi US Secretary of State Antony Blinken-i ashi.

"Ukraine nung amshitsü atema North Korea-i Russia nem munitions aser danga nok-nü agütsür. Iran-ia drones densema nok-nü agütsür aser itemji amshia civilian aser civilian indang ki o jen amaker," ta Blinken-i Mongulbarnü NATO Tir Jens Stoltenberg den senden amenba sülen osangbener dang ashi.

Putin ya Bodhbar aonung Vietnam yimtiba Hanoi atongtsü imlar, kong lenirtemi agizütsü renema lir, koba US-i khukhua aitsür.

## Tir Biden-i 500,000 nem legal status agütsütsü

**Washington, Aami/June 19 (Agencies):** US senso indang apuani meyirijang aika pei limai meyipa yokba nungi kumzüka ayutsü asoshi Tir Joe Biden-i policy tasen ka sangdongtsü lir, ta ketdangsür temi ashi.

Immigration ken o ya election agitsü aliba küm nung Biden asoshi teblemstsü tuluka liasü, shibai US-Mexico arütsü leni migrant tem aruba aziüoktsü asoshi totuyuba agüja liasü.

Policy tasenba ya linük nung küm ter dak tema alirtem asoshi alitsü aser parnokji US nung ozüng agi mela mapa inyaka litettsü.

Iba ozüng yagi apuani 500,000 dak tema ajangzüktsü südi ta White House-i amanger.

Biden-i US immigration system ya tajungba kuma yanglushitsü nangzüka lir. November ita tir atema election

agitsü lia polls agiba nung voters aika atema iba teblemstsü ya kanga tongtipang ta sayua liasü.

Iba policy yagi arishi küm 21 tekübok lanur 50,000 ajangzüktsü ta amanger, shir tsürabor America nunger den kibong kuma lir.

2012 küm Obama administration mapang sangdongba Deferred Action for Childhood Arrivals mesüra Daca sülen ibai undocumented migrants atema amshia aruba relief programme tongtipang ka alitsü.

Daca sangdonger Mongulbarnü küm 12 ajungtsü lia iba osang ya angashir. Daca ajanga tanur ama US-i arur - Dreamers ta ajar - migrants 530,000 dak tema pei limai meyipa meyoki kumzüka lir.

US senso den kibong kumer

aliba undocumented apuani küm 10 linük nung lir aser June 17 tashinung kibong kumer alirtem temsüa akumtsü, ta ketdangsür temi Hombarnü ashi.

Temsüa alirtemi teti alitsü atema küm asem tsüngta apply asütsüla aser küm asem work permit agitettsü.

Ano White House ajanga US universities nungi degree ngur aliba mesüra pei wadang nung mapa agüja aliba highly skilled undocumented immigrants indang visa maparen tekeraba nung yanglutsütsü sentong lir, aser yangji Dreamers tem densema lir, ta ashir. Hopta ana tejkadang Biden-i US ketdangsürtem dang ozüng alema US-i aitba migrants tem indang asylum requests mereprangi tekeraba nung meyipa yoktsü temelaba agütsüba sülen tang iba osang ya arur.

## OFFICE OF THE AOKONG COLONY

FIRING RANGE  
DIMAPUR - 797112 : NAGALAND

### MEETING NUNG LEMTETBA

WARD-12, Kübok Aokong Colony Council den Colony Youth Forum aser Mother's Society külemi Longjemer dang arua aliba ULB (Urban local bodies) Election 2024 atema tsünglanglen agüja aliba pangzüng renema liasü.

- Non-registered voter's mesura outsiders Polling day nü, June 26, 2024 nü Aokong Colony Polling station-i aittsü memelar.
- Colony nung Election dak sendakba maparen nung mangatetteb kar adokra mesüra aibelen-er lira, council-i tapet temerenshi agütsütsü.
- Council-i lemteta ayuba temzüng raksatsüra pei necha khuret asütsü.
- E-Roll (ULB Election 2024) nung tenüng alirtem ajaki pei vote temeden amshitsü council ajanga ayongzükter.

Sd/  
(IMTIYANGER)  
Chairman

Secretary  
Aokong Colony  
Dimapur : Nagaland  
(AOTEMJEN)  
Secretary

## LAND FOR SALE

- COMMERCIAL SITE NUILAND - Highway Touched  
(a) 12 pura (Dry Land) - Rs. 280 per Sqft. (b) 3 pura - Rs. 135 per Sqft.
- 10 Bighas (1 Fishery Pond) Near Kuhuboto Town - Rs. 30 Per Sqft. (Slightly Negotiable) CONTACT NO: 9863826159

## Civil war atema prangbong injang agütsüba asoshi Sudan-i UAE aitsü

**Khartoum, Aami/June 19 (Agencies):** Sudan nung ita

14 tashi civil war adoker mepetmesü nung aliba mapang United Arab Emirates-i paramilitary force ka nem prangbong injang agütsüba atema Sudan-i UAE aitsüogo, aser iba ajanga United Nations Security Council (UNSC) nung linük ana mangatettep adoka liasü.

UN dangi Sudan indang ambassador Al-Harith Idriss al-Harith Mohamed-i, Rapid Support Forces (RSF) nem prangbong injang agütsüba atema Mongolbarnü UAE aitsüogo. Rapid Support Forces (RSF) pur ya 2023 küm April ita nungi Sudan indang army den rara arudar aser parnok rara nung aibelenba atema aitsür lir.

Sudan indang ambassador yagi ashiba agi, prangbong injang agütsüba kuli Khartoum ket nung lir, aser par sorkari UAE inyakyim dak sendakba nung file ka International Criminal Court nem agütsütsü.

Senden tembangba sülen osangbenertem den sensaksema mapang pai ashiba agi, pai United Arab Emirates aitsütsü atema jenjang talila agitsü asoshi council dang mepeshia asüngdangogo.

Security Council table nung Mohamed den atonga mener UAE Ambassador Mohamed Abushahab-i, Sudan-i parnok aitsüba ya tamendakdak maka aser linük nung inyakyim anema inyaksangshiba dak meranglokdaksütsü atema parnok iba taitsüba benoker, ta ashi.

"Parnoki mangatettep adoker aliba anendakja nübürtem timtem tekangshi agintsütsü tejangraba lira kechiba parnok Jeddah nung sensaksemtsü atema marutsü? Kechiba parnok teyari balala agütsübatem nokdanger?"

Parnok kechi atar?" ta

Abushahab-i asüngdang. May ita United States aser Saudi Arabia nati Jeddah nung ceasefire sensaksem tenzüksütsü ayongzüka liasü, koba telok anapronglai nangzüktepba ama minyakba ajanga bangdaker liasü. Ajisüaka Sudan-i shilem agitsü memulung.

Aid agencies temi Sudan ayawara agi meneptsü ana nung lir ta tekümdangtsü metetdaksüogo, aser parnok ashiba agi, linük nung mangatettep adoker aliba telok anapronglai teyari agütsütsü atema tenokdangba agütsüdar.

January ita UNSC atema bendentsüba UN report nung ashiba agi, UAE-i northern Chad nung Amdjarass ajanga hopta nung ishíben RSF dangi prangbong injang yokba kuli lir.

Sudanese armed forces aser RSF na mangatettep ka nungi rara tenzüka sülen nisung 14,000 dak tema tepsetogo, nisung 33,000 yiruogo aser nisung million 10 pei talidak ki toktsür jenshiaogo, ta UN-i ashi.

UN Assistant Secretary-General Martha Pobe-i, Sudan anüolen Darfur tesem nung kin dak ajemdaker tashiyim amshiba tekümdangtsü metetdaksüba sülen Mongolbarnü UN nung iba mangatettep adoka liasü.

Laisa, RSF-i sabanger aliba North Darfur yimtiba el-Fasher nung tangsa tang ceasefire benoka, tashiyim amshiba nokdangtsü, tongtibang infrastructure tem kümzüka ayutsü aser nübürtem timtem tekangshi agintsütsü nüngdakba lemsatepa liasü

Taoba hopta RSF puri el-Fasher sabanger aliba anentsü aser nübürtem amokmerenba sepaitem ajak anintsü khanga UNSC-i bangzüng ka agizükogo.

# Croatia aser Albania na draw nung tembang

## PORTUGAL ASER TURKEY NATI TAKOK ANGU



Albania asayar goal agütsür pelaba noksa nung angur.

**Aami/June 19, 2024**

**(Agencies):** Germany nung tang asaya aliba Euro 2024 asayamung nung Bodhbarnü Croatia aser Albania na asaya goal 2-2 agütsür tembanga liasü.

Asaya nung mezüngbuba goal Albania nung asayar Qazim Laci-i minute 11buba nung goal idakja parnok tejakdang aküm.

Asaya mezüngbuba shilem nung Croatia-i junga masayatet, ajisüaka asaya tanabuba shile nungbo parnoki Albania nung defence nem timtem agüja asaya aser kobi melei minute ana tsüingda goal ana idaktsü.

Croatia atema mezüngbuba goal ya Kramaric-i idaktsü aser mapang tatsüka dang lir asaya

atemtsü minute 14 anunga lia substitute Gjasula dak tepdaker goal tanabuba ai.

Ajisüaka mapang apuloktsür asayaba mapang minute 5buba nung Gjasula-isa Albania atema tanabuba goal idakja asaya kasasa nung tembanga liasü.

Kasa asayamung Group F nung Mongolbarnü Portugal aser Czech Republic na asaya Portugal-i goal 2-1 agi kokogo.

Asaya nung Porto nungi arishi küm 21 tain asayar Francisco Conceicao-i asaya tatem goal ka idaktsüba sülen parnoki iba asaya ya koka liasü.

Asaya nung Czech nung asayar Lukas Provod-i asaya tanabuba shilem nung goal tajung ka idakja parnok

tejakdang aküm.

Cristiano Ronaldo-i aniba Portugal team-i junga masayatetaka parnok asoshi tiaka-a Robin Hranac-i own goal ka idaktsüba sülen goal kasasa aküm aser asaya tatem Conceicao-i tanabuba goal idakja parnoki asaya koka liasü.

Arishi küm 39 tain Ronaldo shiba otsüsüsüsa taküm agi European Championship trokbenbuba nung asayar pai asemen tashi goal nung ball metsüoktsü saka Stanek-i pa nokdanga liasü.

Asaya nungsa Portugal coach Roberto Martinez-i arishi küm 41 tain defender Pepe asayadaktsü, shiba Euros puti otsü nung asayar tambusang kümogo. Taoba mapang Hungary goalkeeper Gabor Kiraly-i (küm 40) iba record bener liasü.

Kasa pool nungisa Mongolbarnü Turkey aser Georgia na asaya Turkey-i goal 3-1 agi kokogo.

Asaya nung mezüngbuba goal ya Turkey atema Mert Mulder-i idaktsü, ajisüaka mapang tatsüka dang lir Georgia nung asayar Georges Mikautadze-ia goal ka idakja goal kasasa aküm.

Iba sülen Arda Guler-i Turkey tema tanabuba goal idaktsü aser atakzükja aliba mapang tembanger mapa apuloktsür asayaba mapang Muhammed Kerem Akturkoglu-i tasembuba goal idakja parnoki asaya kokogo.

**JUNE 20**  
Slovenia Vs Serbia 6:30 PM  
Denmark Vs England 9:30 PM  
Spain Vs Italy  
12: 30am (June 21)

# FC Barcelona football academy ajak shibangtsü

**Aami/June 19, 2024**

**(Agencies):** Alima nung nüngtugu football club FC Barcelona-i, India nung parnok indang academy ajak shibangtsü telemtetba agiogo. India nung aliba tanurtem parnok indang nüngtugu 'La Masia (youth academy)' style nung anitetsü atema küm 14 tejakdang Barca-i iba inyakyim ya tenzüka liasü.

Academy tem shibangtsü telemtetba agiba indang FC Barcelona-i official kuli kecha magütsü. India nung Delhi NCR, Mumbai, Bengaluru aser Pune nung academy tem ajak July 1 nü nungi inyaksangshi anentsü.

"FC Barcelona-i, Delhi, Mumbai, Bangalore aser Pune nung sendaka aliba kibong ajak dang Barca Academy tem July 1 nü nungi inyaksangshi anentsü ta osang agütsüogo," ta club-i

sangdong ka ajanga metetdaktsü.

"Barcelona India nung 2010 küm nungi inyaksangshia aruogo aser iba sülen tanur meyirejang aikati Barca style aser club indang value angazüka football asayatsü angazükogo.

"Maneni India nung 2019 aser 2020 küm Barca Academy APAC tournament ana ayongzüka asayaogo aser Easter hopta Barcelona nung 11buba Academy World Cup nung Academy temi shilem agiogo," ta club-isa metetdaktsü.

Nüngtugu football asayar Lionel Messi, Andres Iniesta, Sergio Busquets aser Gerard Pique nung training agiba sülen kanga nüngtugu küma liasü.

FC Barcelona-isa, kümtem tsüingda parnok project dak tamang akaba atema kibong

ajak, coach, local staff, aser Conscient Football, India nung Barca academies project nung club indang partner ajak dang kanga pelaba lemsatepogo.

India nung Barca Academy ya grassroots football training aser development initiative tulutiba liasü.

Iba dak alia club-i Delhi, Gurugram, Noida, Mumbai, Bengaluru, aser Pune nung football training centre aika amenokogo, sentong, camp, league, asayamung aser exposure trip tem aika ayongzüka agiogo.

Barca Academy ya FC Barcelona school indang flagship sentong ka lir, koba arishi küm 4 nungi 17 tsüingda aliba tetsür aser tebur chanutem nem comprehensive training environment ka agütsütsü nükjidong nung tenzüka lir.

# Tanzim Hasan dang senchi achi

**Aami/June 19, 2024**

**(Agencies):** Tang asaya aliba T20 World Cup nung Group D nung Nepal den Arnos Vale Ground nung asayaba mapang Code of Conduct Level 1 nung aibelenba atema ICC-i Bangladesh nung pacer Tanzim Hasan merenshiogo.

Iba tatalokba ya Deobarnü ataloka liasü aser ICC-i pa nem temerenshi agütsüba officially sangdongogo.

ICC sangdong ka ajanga ashiba agi, Tanzim ICC Code of Conduct for Players and Player Support Personnel indang Article 2.12 nung aibelenogo, kong international asaya ka nung asayar, Player Support Personnel, Umpire, Match Referee mesüra asaya repranger densema nisugn mashi ka dak yimya mesüi kongshiba atema merenshitsüba shisema lir.

Nepal pur batting amenba mapang tasembuba over tembangba sülen Tanzim-i ball aonba sülen yimya mesüi Nepal batter Rohit Paudel dangi ao



aser pa dak kongshia liasü.

Iba aibelen menaba sülen Tanzim dang pa indang match fee shilem 15 senchi chiogo aser pa indang disciplinary record nung demerit point ka nguogo. Taoba ita 24 tsüingda pai tang mezüngbuba aibelen liasü.

Tanzim-i pai aibelenba nangzükogo aser Emirates ICC Elite Panel of Match Referees züingsem Richie Richardson-i temerenshi agütsütsü atema benokba pai agizükogo, anungji formal hearing ka agitsü nüngdak madoker.

# Mbappe temang mejungi lir



**Aami/June 19, 2024**

**(Agencies):** France captain Kylian Mbappe, Euro 2024 nung par team Netherlands den asayatsü aliba asaya nung shilem agitettsü magitettsü mejangjai lir, ta French Football Federation-i metetdaktsü.

Hombarnü Austria goal 1-0 agi akokba asaya nung pa teni raksaba sülen pa temang mejungi lir.

Group D nung Netherlands den Hokolbarnü Leipzig nung asayatsü aliba asaya nung Mbappe asayatetsü masayatetsü mejangjai lir, ta FFF-i Mongolbarnü metetdaktsüba den iba dak sendakba nung takaratiba nung osang agütsütsü ta ashi.

Arishi küm 25 tain asayar ya Duesseldorf nung asaya tatem Kevin Danso den tsüktepba

mapang pa teni Austria nung defender sang tapu nung kanga mejungi atsükba sülen yirua liasü.

Mbappe, shibai metsüba ball ka Austria nung Maximilian Woeber dak tsükdaker aiba ajanga France puri asaya koka liasü, pa asaya tatem yiruba sülen azü agi tola ajak yangbanger tugua liasü.

Iba sülen French federation-i, Mbappe Duesseldorf nung mozüki ka nung temang anepaluogo aser iba sülen Paderborn nung France squad anenzüka aliba tesemi anir oa liasü, ta ashi.

"Pa kanga mejungi yirur lir, aser pa yiruba ya onok ajak asoshi tejashitsü anogo ka," ta France coach Didier Deschamps-i Austria den asaya tembangba sülen ashi.

## BILEMDANGANG

"Sentsütsür tawadadak makar."